



UNIVERSITÄTS-
BIBLIOTHEK
PADERBORN

Universitätsbibliothek Paderborn

Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

Vniversis Presbyteris per decanatum de Sparnon. in Carnoten. diocesi
constitutis.

urn:nbn:de:hbz:466:1-20006

sententiam, quam in ipsos propter hoc ratione prævia tuleritis, ratam habebimus, ipsamque faciemus auctore Domino usque ad satisfactionem congruam firmiter observari. Provideatis autem, ut quilibet vestrum tamdiu faciat eandem sententiam per suam dioecesim observari, donec mandatum nostrum celebrari executione complectum. Datum Laterani VIII. Idus Martij.

VVORMACIEN. EPISCOPO.

Epist. 44.
Vt festum conversionis beati Pauli celebraret, & faceret per suam dioecesim solemniter celebrari.

Cum post evangelicam veritatem Ecclesia Dei apostolica præcipue doctrina resplendeat, & beatus Paulus ad instructionem gentium & fidem catholicam propagandam præ ceteris apostolis laborarit, miramur non modicum, & movemur, quod, sicut nostris est auribus intimatum, festum conversionis ejus in diocesi tua non colitur, licet passionis anniversarium ibi solemniter recolatur; cum non minus conversio ejus, quam passio, sit christicolis omnibus veneranda. In conversione siquidem Saulum ab impugnatione fidelium revocavit dispensatio IESU CHRISTI, in passione vero Paulum ob prædicationis officium Neronis crudelitas interfecit. Ibi dextera Domini fecit virtutem, hic tyranni gladius intulit passionem. Ibi Dominus animam persecutoris salvavit & corpus, hic servus nequam apostoli prædicantis corpus sine animæ læsione peremit. Præterea non paucioribus ejus conversio contulit, quam passio profuisset; cum plures sint, ad quos prædicationis ejus sonus exiverit, quam qui ejus exemplo subierint passionem. Nobis enim vivendo profuit, sibi contulit patiendi. Nobis etiam iam conversus, ut similes ejus essemus, exceptis vinculis, cupiebat. Sibi autem dissolvi, & esse cum Christo, affectabar ardentius moriturus. Nec ipsius fuisset passio gloriosa, nisi sancta conversio præcessisset. Cum igitur ob ipsius merita ex antiqua Ecclesiæ institutione festum conversionis ejus à fidelibus recolatur, & turpis sit omnis pars suorum non congruens, nec deceat à capite membra discedere; fraternitatem tuam monemus & exhortamur in Domino, ac per apostolica scripta præcipiendum mandamus, quatenus juxta consuetudinem apostolicæ sedis, cujus magisterium imitari teneris, festum conversionis ejusdem apostoli & tu ipse observes in poste-

rum, & facias per totam Wormacien. dioecesim solemniter celebrari, in honorem ipsius apostoli divinis laudibus diligentius & sollicitius vacaturus. Datum Laterani Nonis Martij.

VNIVERSIS PRESBYTERIS
per decanatum de Sparnon. in Carnoten.
diocesi constitutis.

Cum prælati Ecclesiarum ad id quod pium & canonicum est, discreta consideratione trahuntur, cum frequenter detur usus proclivior in pejora, & libenter audimus, & eis in his favorem apostolicum indulgemus. Quoniam igitur ex publico instrumento venerabilis fratris nostri Reginaldi Carnoten. Episcopi nobis manifestè innotuit quod ab omnibus violentiis, talleis, & exactionibus vos perpetuò absolvisset, & super hoc suum vobis privilegium indulgisset, ne contra juris ordinem in aliquem vestrum aliquando suspensionis sententiam promulgaret, nec res alicujus vestrum occuparet aliqua ratione, nisi forte decederet intestatus, & hoc idem sit per venerabilem fratrem nostrum Senonen. Archiepiscopum & dilectos filios Capitulum Carnoten. Ecclesiæ confirmatum, prout in instrumentis eorum noscitur plenius contineri; ad postulationem vestram, ut ab indebito cesset gravamine, robor confirmationis apostolicæ duximus apponendum, & ad majorem rei evidentiam ipsius authenticum confirmationi nostræ de verbo ad verbum mandavimus inferendum. *Reginaldus Dei gratia Carnoten. Episcopus omnibus ad quos litteræ istæ pervenerint, perpetuam in Domino salutem. Cum hucusque nostris & prædecessorum nostrorum Episcoporum Carnoten. temporibus presbyteri episcopatus Carnoten. talleis & exactionibus oppressi fuerint indebitè & gravati, hoc etiam in oculis omnium videatur omnino dissonum, & saluti animæ contrarium, proborum hominum sano consilio utentes, & saluti animæ nostræ providentes, universos presbyteros in decanatu de Sparnone constitutos ab omni vi, violentia, talleis, & exactionibus perpetuò absolvimus. Ita etiam quod nullus presbyterorum decanatus de Sparnone, nisi ordine judiciario, suspendi poterit, nec res alicujus saisientur, nisi ipsum intestatum (quod absit) viam universæ carnis ingredi contigerit. Si quis autem huic nostræ constitutioni obviare seu contraire*

Epist. 45.
De confirmatione privilegij eisdem concessi ab Episcopo Carnoten.

presumpserit, subiaceat excommunicationi. Quod ut ratum firmumque permaneat, presentem paginam in testimonium fecimus annotari, & sigilli nostri auctoritate in testimonium roborari. Datum Carnoti anno gratiae M. C. LXXXV. X. Kalend. Novembris. Hanc ergo constitutionem, & indulgentiam ejus, sicut superius annotata est, ne debeatis ulterius indebitè aggravari, auctoritate apostolica confirmamus, & praesentis scripti pagina communimus. Nulli ergo &c.

In eundem modum universis presbyteris decanatus Brajolen. universis presbyteris Archidiaconatus Pisiacen. universis presbyteris decanatus de Rupeforti, universis presbyteris decanatus de Corbavilla, universis presbyteris decanatus de Alneolo, universis presbyteris Dunen. Archidiaconatus, universis presbyteris decanatus Paricen. universis presbyteris decanatus Drocen. & universis presbyteris decan. Bruerolen.

**ARCHIPRESBYTERO ET
Canonis Perusinis.**

*Epist. 46.
De confirmatione constitutionis inter se mutuo assensu factae.*

AD tollendas lites illas, quas fratrum plerumque odium comitatur, per quas etiam quies profectusque claustralium impeditur, speciali sollicitudine intendere nos oportet; quanquam generaliter omnium fidelium amplecti pacem & quaerere ex injuncto nobis pastoralis curae officio teneamur. Ea siquidem consideratione diligenter inducti, cum ad notitiam nostram super observatione ordinis in Ecclesia vestra vobis divisim adinvicem, & propter hoc ad sedem apostolicam laborantibus, quaestio pervenisset, dilectum filium G. sancti Adriani Diaconum Cardin. vobis designavimus auditorem. Mediante itaque ipsius vigilantia studiosa inter vos super discordia illa per Dei gratiam amicabiliter convenistis, & certam inde constitutionem mutuo consensu formastis, quae futuris temporibus à vobis & successoribus vestris perpetuò debeat conservari. Eam autem nobis fecimus recitari, & auditam auctoritate curavimus apostolica confirmare, rationabilem ipsam & sine pravitate vitio cognoscentes. Unde ad majus indicium firmitatis constitutionem eandem praesenti scripto duximus inferendam. Est ergo in ipsius vestrae compositionis principio constitutum, ut in Ecclesia vestra sint octo regu-

lares Canonici & professi, duo alij clerici, qui in subdiaconatus vel acolytatus officio tam interius, quam exterius, sufficiant deservire: in quorum servitio nullus omnino laicus admittatur. Praedictorum autem octo major Archipresbyter erit, alius Ordinarius, sequens Camerarius fiet; ita quod Archipresbyter inter omnes praelationis officium obtinebit, utpote cum sit penes eum omnis circa domum ipsam auctoritas, & ipso praesente cuncta cessent officia, & per eum, cum assensu tamen omnium fratrum, vel majoris partis, cum necesse fuerit, disponatur. Ordinarius verò claustrum debet ex officio custodire, signare diligenter, & auscultare à singulis lectiones: quia nullus debet legere, nisi lectio, quae legenda est, prius ab eo fuerit auscultata. Divina officia in Ecclesia temperabit, & qua voce utendum sit, servato moderamine providebit. Religionem faciet observari, vices Archipresbyteri in ipsius absentia suppleturus. Excessus quoque, si qui essent, (quod absit) in Capitulo referet, & cum consilio fratrum, absente Archipresbytero, penitentiam super his imponet. Libros debet nihilominus custodire. Haec omnia quae praemisimus, si utrumque istorum abesse contigerit, per tertium debet sine recusatione suppleri. Camerarius siquidem omnia debet recipere, & etiam ei convenit resignari quicquid ad manus devenerit aliorum. Ipse verò, quod cuique opus erit, juxta facultates domus providè dispensabit. Mancias, & alia quae fuerint necessariò danda, intus & foris, cum consilio Archipresbyteri sine murmure tribuet. quo absente, recipiet hospites, & eis hilariter ministrabit. Cum autem fuerit Archipresbyter eligendus, eligentur prius à Capitulo tres de ipsis fratribus bonae opinionis & vitae; quorum unus sit presbyter, alius diaconus, tertius subdiaconus: qui exquisita seorsum, & per scripturam, fratrum omnium voluntate, illum eligent, & in sede constituent, in quem majoris & sanioris partis vota concurrent. Quo facto, eidem habenti regulam beati Augustini praemanibus, tribuent omnes obedientiae manum. Erit autem talis electus, qui vel sit sacerdos, vel possit ad sacerdotium promoveri. Ipse verò Archipresbyter Ordinarium & Camerarium, prius tamen assensu fratrum omnium vel sanioris partis requi-